



Samþykktir fyrir samráðshóp um málefni aldraðra í Grímsnes- og Grafningshreppi

1. gr. Umboð

Samráðshópur um málefni aldraðra í Grímsnes- og Grafningshreppi starfar í umboði sveitarstjórnar Grímsnes- og Grafningshrepps með þeim hætti sem kveðið er á um í samþykktum þessum.

2. gr. Verksvið

Samráðshópurinn skal vera sveitarstjórn og nefndum Grímsnes- og Grafningshrepps til ráðgjafar um málefni og hagsmuni sem varða íbúa sveitarfélagsins 67 ára og eldri. Auk þess að vera til ráðgjafar getur ráðið beint tillögum og ályktunum til sveitarstjórnar og nefnda. Samráðshópurinn er ekki framkvæmdaaðili.

3. gr. Hlutverk og markmið

Samráðshópurinn er vettvangur samráðs eldri borgara, félagasamtaka þeirra, atvinnulífs og sveitarstjórnar og er virkur þátttakandi í allri stefnumörkun málaflokksins. Samráðshópurinn er ráðgefandi fyrir starfsemi sveitarfélagsins í málaflokknum og stuðlar, í samstarfi við stofnanir á vegum sveitarfélagsins, að eflingu félagsauðs og kynningu á þjónustu sveitarfélagsins til eldri borgara.

Helstu markmið eru:

- Samráðshópurinn stuðlar að skoðanaskiptum eldri borgara og kjörinna fulltrúa um stefnu og framkvæmd málefna eldri borgara í Grímsnes- og Grafningshreppi.
- Samráðshópurinn stuðlar að heilbrigðri öldrun og sjálfstæðu lífi.
- Samráðshópurinn stuðlar að aukinni samstöðu milli kynslóða til að skapa samfélag fyrir alla aldurshópa.
- Samráðshópurinn leitast við að tryggja að aldraðir fái þá þjónustu sem þeir þarfnast.
- Samráðshópurinn hefur að leiðarljósi markmið laga um málefni aldraðra.
- Samráðshópurinn gerir tillögur til sveitarstjórnar um öldrunarmál.
- Samráðshópurinn er tengiliður við Öldungaráð Uppsveita og Flóa.

4. gr. Skipan

Samráðshópurinn er skipaður þremur fulltrúum. Sveitarstjórn kýs einn fulltrúa og annan til vara. Eldri borgarar tilnefna tvo aðalmenn og tvo til vara. Sveitarstjórn skipar formann ráðsins



en samráðshópurinn skiptir að öðru leyti með sér verkum. Formaður ráðsins er jafnframt fulltrúi sveitarfélagsins í Öldungaráði Uppsveita og Flóa. Kjörtímabil samráðshópsins er hið sama og sveitarstjórnar.

5. gr.

Boðun fundar og fundarsköp

Samráðshópurinn skal að jafnaði halda fjóra fundi á ári auk árlegs fundar með sveitarstjórn. Formaður getur boðað til aukafunda eftir þörfum. Formaður samráðshópsins boðar til funda, ákveður dagskrá og stýrir fundum hópsins. Á dagskrá skulu m.a. tekin mál sem fulltrúar í hópnum hafa óskað eftir að tekin verði fyrir enda séu þau á verksviði ráðsins. Fundir skulu boðaðir með a.m.k. tveggja sólarhringa fyrirvara og skal dagskrá fylgja fundarboði. Rafræn boðun fundar og útsending fundargagna telst fullgild boðun.

Hópurinn getur boðað til fundar einstaka starfsmenn Grímsnes- og Grafningshrepps sem og aðra þá sem það telur þörf á hverju sinni. Um fundarsköp og önnur atriði gilda ákvæði sveitarstjórnarlaga og samþykkt um stjórn og fundarsköp Grímsnes- og Grafningshrepps. Sveitarstjóri hefur seturétt á fundum ráðsins með málfrelsi og tillögurétt. Fundarseta er launuð sem almenn nefnd á vegum Grímsnes- og Grafningshrepps.

Samráðshópurinn skal rita fundargerð í tölvu samkvæmt fyrirmynd af fundargerð frá Grímsnes- og Grafningshreppi. Fundargerð skal ritari skila sem fyrst til sveitarstjóra sveitarfélagsins.

6. gr.

Réttindi og skyldur nefndarmanna

Fundi skal að jafnaði halda fyrir luktum dyrum. Fulltrúar eru bundnir þagnarskyldu um málefni sem leynt skulu fara skv. eðli máls og meginreglum laga. Óheimilt er að greina frá ummælum einstakra fundarmanna á lokuðum fundum.

Um hæfi fulltrúa samráðshópsins gilda ákvæði 20. gr. sveitarstjórnarlaga nr. 138/2011, II kafli stjórnarsýslulaga nr. 37/1993 og samþykkt um stjórn og fundarsköp Grímsnes- og Grafningshrepps. Við undirbúning mála og stjórnvaldsákvæðanir skal þess gætt að farið sé að stjórnarsýslulögum og verklagsreglum um stjórnarsýslu.

Samþykkt þessi var samþykkt á fundi sveitarstjórnar Grímsnes- og Grafningshrepps þann 6. júlí 2022 og tekur þegar gildi.

Grímsnes- og Grafningshreppur, 6. júlí 2022

Sveitarstjóri Grímsnes- og Grafningshrepps